

摘藻堂四庫全書薈要

集部

欽定四庫全書薈要卷一萬五千八百一

集部

盤洲文集卷五十一

宋

洪适

撰

申省狀二 書五

荆門軍論茶事狀

某近已條奏敷茶之弊而私憂過計又恐勘當不許以今年從便住賣之數立為新額只申嚴法禁行下則使斯民不需寬恤之實惠必不得已權時之宜不致虧失經費又不重困民力使官民兼濟則某有愚見伏望鈞

慈赦其狂瞽之罪某本軍見排造戶籍再三與民戶較量謂朝廷以寬恤為政若以利害申明必降指揮不許違法均敷但恐客人遽失高價故意過絕不來致令本軍虧折歲額欲行申請乞給降茶引本軍自行勸誘上等稅戶依客人入納官錢之數就軍買引自往鄰近土產處收買堪好真茶以實價分均食用咸謂若得如此施行民戶自往買茶免得虛費高價亦為民利某之狂愚欲望鈞慈特賜減損荆門軍歲額以其數每年徑就

提舉司請引至本軍從長招誘客人或民戶筭請只依元引收頭子錢外更不別收勘合等錢俟至歲終本軍以其錢買銀付提舉司或鄂州總領司交納則於兩縣之民買引得茶之外每歲實減錢一萬五千餘貫此其為利不鮮如蒙從某所請乞自紹興二十九年為始俟指揮到日若春季已批發過客人鈔引乞許理作今年之數仍乞下提舉司於鈔引上朱批係是荆門軍筭請之引只得前來本軍住賣以免侵紊他州歲額兼乞下

提舉司告示產茶去處除本軍朱批鈔引之外却不許別用客人他引批指前來本軍以免攬奪給降引數於法鈔引許留民間九年今既本軍人戶自行買引却恐當年未必便能一一買茶欲乞本軍每年只是趁納給到引價錢其住賣倒引乞隨逐年多少申繳庶使公私兩便如是向去戶口繁盛比及承平商旅通行見得從便可以趁額則乞許以後守臣申明朝廷自依常法更不逐年給降又緣荆門小壘難得銀子尋常貢賦多是

擔錢至荆南府買銀今每年至提舉司請引及管押人  
納銀有汭路脚乘等費若不立下些小糜費恐官司別  
無所出巧作名目因緣多取於民某面問民戶欲令每  
斤增收五文省作糜費使用皆稱情願出備若於外官  
吏別行增添收取並乞計贓坐罪

復解額申省狀

本軍據軍學進士張禮等一百二十九人陳狀稱本軍  
舊解額五人靖康元年范如圭任彥直高敷田幡然扈

夔同年發解范如圭見任利路提刑任彥直見任恭州  
監稅頃因劇盜以荆門為巢穴軍治鞠為荆棘人民死  
徙略盡至紹興五年收復方以武臣作守驅除虎狼鳩  
合遺萌始有人煙至紹興七年省部會問靖康元年終  
場人數紐取立額其時本軍士人逃散未歸知軍胡修  
武不以儒生為意只就軍城據流寓陳天將供稱靖康  
年有二百二十人終場其年就江陵附試遂以四十四  
人解發一人續後本軍士人漸歸却見解額人數異同

遂於紹興二十一年經轉運司及本軍陳訴稱在承平  
時本軍初未曾及二百人終場之數蒙追問陳天將供  
稱係是應天府流寓人當來實不曾就荆門取應靖康  
年科場蓋是一時公吏且欲回報上司令天將妄亂供  
報所有本軍士人除建炎紹興之初兩次無人取應外  
紹興七年江陵府附試終場七人解發一名至紹興二  
十六年終場四十六人亦只解發一名今來士子蒙朝  
廷養育作成垂三十年已及承平人數緣本軍去江陵



一百八十里貧者乏於裹糧而幼者父母不容遠去遂使每次不能盡往赴試致見人數不增只以一人備數乞行申明復額某遂取責到本軍紹興二十六年鄉飲酒除疾患不赴人外有八十八人成禮並見今係籍學生共一百六人並會問到鄰近州府體例江陵府以省記到靖康元年數係十人七分取一人紹興七年終場五十二人解發三人紹興十七年終場一百六十六人解發十一人已復舊額峽州靖康元年係八人取一人

紹興七年終場二十人解發三人紹興十四年終場七  
十三人解發五人已復舊額歸州靖康元年係七人五  
分取一人紹興四年終場二十人解發三人紹興十年  
終場二十九人解發四人已復舊額復州靖康元年係  
十二人取一人紹興十年終場五人發解一人紹興二  
十六年終場三十人發解三人某檢照本軍公案有紹  
興二十一年內取責到靖康元年發解人高敷主簿供  
稱當年終場係是六十五人並見存鄉貢進士丁庭瑞

亦係靖康取應之人所供符同其陳天將供伏妄報文  
狀具在可考某竊聞胡文定父子俱在荆門寄居故朱  
內翰之類遠來就學如朱內翰胡侍郎皆是荆門預薦  
登科所以荆門士人師授頗有淵源今既解額頓窄又  
附試他郡憚遠不能盡行致令薦送數損無以激勸有  
阻遠方士人進修之意某又伏覩紹興重修薦舉法備  
載紹興四年指揮緣淮南兩路無靖康元年終場之數  
只比附泰州之數權立諸州解額每十三人解一人今

湖北諸郡並是十五人以下解發一名不應荆門獨以四十餘人為額顯是多寡不均如江陵府只是憑據人吏省記立額本軍見存靖康發解取應之人可驗不誣已將會到諸州府解發人數錄白申納禮部准備取索照會訖謹具申尚書省伏望鈞慈憐念遠方士人乞將紹興二十九年科場比附本路鄰近州軍體例別賜詳酌改立解額行下

代上宰相書

某鹿鹿公膺至愚極陋蹤跡草芥顧不足進陳於帝師  
大丞相之前僥覲觀采之萬一然伏自思念在熙豐時  
曾祖躋身綸闈勸講帝幄在政和時大父籠宇內之才  
為天子侍臣不肖之孫墮其家聲無可云者而天借之  
幸名絳官牒猥受化工之賜漕臺鍾官游居部使者之  
屬雖翹材大館所以羅致英雋而最爾姓名得塵拔士  
之錄亦十有七年某也佩山嶽之施懷杪忽之報刻肌  
鏤骨矢心自誓亦不敢輒處衆人之後退惟陽春播物

莩者萌者無不蒙被寵光吐葩颺榮動搖和風拱把之本根至於能蔭牛馬柔條弱蔓亦能上凌青霄發生之功何可遽數士於斯時託身鑪錘朝泥塗而暮雲漢造化之力與春等耳今欲軋滯思飾瑣說抒憔悴可憐之情顧小已區區之私夫何足以仰瀆威尊竊念窮而呼天理所必致捨恩門而不進一辭則鼠肝蟲臂何所自託耶重念某寅緣世及饕竊祿仕雖表治之緒不敢廢而材智駑下不能見穎濫巾王官庇身大邑罷精耗神

日懼奉職救過不給蓬徙塵走幸終瓜戍得逭萬一之  
罪而孥累猥衆退無負郭土腴可以耘耔代祿仰首搖  
尾希筆端膏澤庶幾復尋故步少逃州縣之勞以免溝  
壑之填仰惟某官天命隆棟為時宗臣衅甲歸馬泰山  
四維功業卓偉固已鏤景鍾書金匱非某趑趄所能鋪  
張梗概厥今太平有象物物遂性動植飛潛鼓舞覆燾  
之間遐邇耄穉共壤而擊豈門牆賤士不能澤吻一鳴  
自求斗升之水是敢犯嚴肆言以累埏埴冒觸等威某

下情不勝戰灼待命之至

代上前執政書

某仰惟聖天子奮乾剛旋太阿尺一招賢慨乎如不及  
并謀兼智以濟登解絃上治自台鼎侍橐諫官御史臺  
郎儒館無有大小楹然一新鴻儀鷺序皆乙亥前幹棄  
沈淪之耆傑外而价藩近鎮亦暫屈舊老敷和蘇枯刻  
磔淄粃然後入都卿相之位恭惟某官以碩德垂典刑  
以昌謨翼帷幄簡於細旃燿於汗簡舊矣蠅營醜正積



年居東天日清明人人瞻冀霖雨寄足方面寔儲巖石  
之望宜告舍人趣治相國裝行即召矣某才品凡下無  
尺寸逾人低徊塵壒星終其二視王公大人如參辰麗  
天可望而不可親又安有覲顏色之溫侍警效之重者  
乎竊謂閣下鄉著西府遂持國秉則陽春膏澤可以窮  
垓匝宇而槐府潭潭某也雖欲下望塵之拜所不可得  
是閣下昔者之用乃天下之幸某之不幸也訪蘇耽之  
仙跡上義帝之故城而某乃得與遐萌小吏企末光而

承餘澤是閣下昔者之未用乃某之幸天下之不幸也  
今茲綸札鼎來使軺之袂相屬歸輔九五雍容槐楓之  
上退而謀國門牆尊嚴雖欲介郴陽之既見復邇秦階  
戛戛乎其難哉僥幸閣下撫封江右卓馬少駐某餬口  
番城距高牙一衣帶水幸之再來天也捨此時不干館  
人望履幕非鄙則病是敢促櫓絕湖趑趑輿阜下陳以  
覬鉅公一眄之榮若夫穆天緯經國體措天下泰山之  
安則其規撫已素定閣下之胷府某一介愚瞽無以効

渤海議曹之獻至於白涸轍之狀鳴負丞之賤又不敢  
墨筆操牘諂諂以溷稜威伏惟閣下貫其罪而與其進  
焉干犯鈞嚴某下情不勝戰懼之至

與朱舍人書

某比獲撰屢辱賜南遷詩一編一百有四首自曲江過  
曹溪抵東衡州凡三日垂二百里右手執帙左手持轡  
目注心存哦誦乎齒吻不知林巒之所歷嚶哢之度耳  
也昔屈大夫受讒於楚長吟澤畔離騷章句上追詩雅

然桀紂羿澆等事反復致詳雲霓惡草之諷尤夥後之  
廢放者其寫悲寓懷之語必含怨刺雖韓退之為時宗  
師柳子厚文映古今猶有雙鳥訓狐之詩宥蝮螭螭之  
文中書文人以贍學偉辭為甘泉望臣良筆婉遷董大  
冊落班揚遠徙曲江八變寒暑他人必憂懟亡聊日夜  
企而望歸我公乃買園葺亭培植自適一編之詩皆與  
諸郎快婿邦人之可語者投壺圍碁登臨所賦語工而  
意和格高而辭樂無鬱鬱不平之氣芽於中而發於外

也其賢於人如是夫豈久留此者耶某不肖不能窺見  
彷彿姑以所歎授圉人持歸以獻

三省與金帥書

王忤來歸伏奉緘誨反復曲折備見勤誠玩味再三不  
勝欣荷伏惟元帥丞相為社稷之重臣兼將相之大任  
明良胥會言聽計行生靈休戚係乎轉眄皇帝仰奉兩  
宮俯憐赤子感大德尋盟之意捐棄細故務在曲從誓  
書悉如來戒信使亦令啓行歲輸銀絹見已計置起發

商州舊疆更不靳吝但以茲夏先歸四郡繼有渡淮之  
後今俟使命回程寢兵休士便行交割係虜之人即令  
有司刷會續當實告以遵嚴約無事繁辭歲律將周神  
明陰相濟民仁壽同享升平垂譽無窮天下幸甚

三省與金帥書

比布訊緘遂勤誨牘風埃匱薄審閭制之賢勞神明扶  
持喜天休之滋至念二儀以好生為德蓋百戰者不祥  
之兵修此齊盟出於初議中因曲見或為矛盾之言致

此數年未講衣裳之會茲聆嘉報不替舊歡仰衛社之  
大忠感睦鄰之高誼已遵要束無復異同雖遠方有雙  
鯉之書豈殫情素使兩國若一家之子永戢仁私瞻溯  
惟深敷云曷罄

盤洲文集卷五十一

欽定四庫全書薈要卷一萬五千八百二

集部

盤洲文集卷五十二

宋 洪适 撰

啓十三首

謝試中詞科啓

追攀逸駕驚駘方困於奔馳推擇遺材瓦礫幸逃於沙汰既擢桂枝之秀更聯棣萼之華人以為榮已獨甚愧嘗謂昔人之學實期大道之明遠紹旁搜究聖括行藏之蘊博聞強識達古今治亂之原未嘗汲汲於功名寧



復區區於文藝迨後世設章程而取士故諸儒追時好以謀身任輿義以榛蕪既潢潦根源之失窺陳編而漁獵皆馥膏沾丐之餘故窮經淹貫者或拙於文而摘藻道麗者又短於學舉由一律疇克兩全愚賈操金遂見譏於書簾輕縑窘幅終莫擅於詞宗分轡並驅濫觴滋久惟昭代廣搜賢之路有詞科籠拔萃之才為異時翰墨之儲極一旦搢紳之盛是必撐腸拄腹該九丘八索之遺言出脇穿心騁三都二京之殊軌夫能偶古作者

茲可為時聞人如某者愚鈍亡長迂疎甚陋材既同於  
樗散性實肖於棗昏自家君有去國之行故幼歲失趨  
庭之訓瞻雲在望思學治之相傳歷日彌長懼析薪之  
弗繼雜綺襦而造迹對縫掖以汗顏期自致於青霄遂  
力親於黃卷然舌耕莫之有得而腹橐終亦無奇窺豹  
一斑可笑管中之淺見食鷄千跖漫尋紙上之空言雖  
非倚門牆而誦韓莊之書抑亦處畎畝而樂堯舜之道  
落花點綴聊以自娛雌霓連蜺伊誰見賞悵榮名而尚

邈慮素志之終違既不能脫一行吏籍之勞將何以慰  
萬里親庭之望決科孔易徒枉事於雕蟲作文不成殆  
何辭於刻鵲遂捐舊業遽習殊科揚雄寧免於客嘲班  
固屢酬於賓戲甫臨勅敵輒廁俊游戴縑垂纓于于焉  
而來矣抽毫進牘戛戛乎其難哉搜石室之舊文擬玉  
堂之丕律成功曰頌慚周什之清風作器能銘媿郢歌  
之白雪記序不工於述事表章復拙於陳情方虞鼠技  
之已窮豈意鴈行之並列獲紹滿籛之業遂逃飲墨之

羞驟掇虛名敢自希於雙壁尚遺季弟終有慙於三珠  
顧此叨逾由夫幸會茲蓋伏遇相公中興名相間出真  
儒國勢既尊增大呂九鼎之重台躔有爛應泰階六符  
之光雖伊呂之佐無以加彼蕭曹之勛不足道當君子  
長育之盛世推大臣教載之仁心遂至冥頑亦蒙甄採  
某敢不磨礱事業砥厲廉隅刻意讀書願入崔公之室  
銘肌報德敢荒陸氏之莊 知舉直院給事受天英氣  
名世真儒追渾噩以還醇極內相代言之美竭忠嘉而

論事振東臺批勅之風懷推轂之仁心典揚衡之公選  
吞雲夢者八九既已包荒取武成之二三未嘗求備幸  
托粉榆之好漫成桃李之陰曾是冥頑亦蒙甄採 叅  
政明堂梁棟清廟鼎彝遭聖主而上下交欣沛巨魚之  
縱壑有忠臣而姦邪不起凜猛虎之在山偉然百世之  
師卓爾萬夫之望當長育之盛世推教載之仁心遂致  
冥頑亦蒙甄採某敢不磨礱事業砥厲廉隅傾液漱芳  
庶足三冬之用騁妍抽秘或推一日之長誓殫犬馬之誠

少効珠環之報 樞密明堂梁棟清廟鼎彝偉然百世  
之師卓爾萬夫之望發謀右府賴曲逆之腹心將命遐  
方得月支之要領每極招求之道曲懷推挽之心下同  
前

謝勅局進書改官啓

丁年諾仕瞻上相之後塵甲令奏篇玷中都之顯秩脫  
選調七階之冗綴朝班八品之華受賞非常歸恩有自  
竊以策名委贄期風穴之高翔躡級限年覺天梯之難

上反故紙而沈迷州縣之職懷漫刺則趑趑公卿之門  
然而玩歲居閒吏課鮮周於六考起家寡援薦書莫望  
於五章錄錄亡奇滔滔皆是書局素稱於捷徑士林咸  
指為清蹊雖曰便今著為律而疏為令不妨稽古誦其  
詩而讀其書至積久以成文復叨榮而更選欲重條章  
之出遂無資格之拘如某者襪線何長囊錐非穎假蔭  
始慚於高士立身期企於醇儒久勤陟岵之思常佩過  
庭之訓斗南與對惟黃卷之聖賢江左相傳有青箱之

家世偶殫薄技輒中異科幸結綬而登王畿免抗容而  
走俗狀備員公掾接武英游溢甫刑則除之初無鈎校  
之善取秦法之善者莫知攢撫之因逮三尺之克終誠  
萬分之何補絲綸錫命既仰拜於楓庭紳笏生輝若重  
登於桂籍茲蓋伏遇某官謀深挈國術妙取人王室中  
興雖一木獨成於大厦泰階相比欲衆星同共於北辰  
方參朮芝桂以自資故管蒯絲麻而無棄遂令弱植亦  
預優恩某敢不並厲遠圖更堅持操狗馬自度莫知酬



報之方桃李不言盡託生成之賜

謝除秘書省正字啓

約法三章初乏刊修之善聚書四部遽叨是正之除仰  
拜恩私內深感懼竊以乘槎問漢瞻東壁之文星結綬  
登畿列西崑之仙籍是稱美職以待勝流蓋將為選用  
之階故聊試校讎之事惟圖書之錯亂從古以然而籤  
牒之散亡於今尤甚幸昌代求遺之既廣致積年著錄  
以寢全多魯論之二篇類皆紛糅脫酒誥之一簡詎免

斷殘豕亥相傳銀根未定克稱厥任亦難其人如某者  
識智卑凡材資么庸伏周孔之軌躅雖欲自強慚游夏  
之淵源其如弗及每省鼠窮之技敢逃狗曲之嗤乃刻  
楮以偶成致吹竽而濫中脫州縣一行之吏裁國家三  
尺之文奏篇方冒於殊恩出綍復躋於華貫才非七步  
已無子墨之可稱學媿五車政恐雌黃之妄下遂竊登  
瀛之美更增入洛之榮接武英躔偶棣華之同列覃思  
藝圃庶藜杖之分光自揆僥逾率歸推擇茲蓋伏遇某

官經邦道備致主勛高巨艦濟川獨任維持之重大鈞  
播物曲全造化工若富家兼積於腴腴故匠氏不遺  
於椳闌致茲瑣質得造清途某敢不克已自脩銘心圖  
報朝廷既正固無劉晏之憂書策在前遂畢李邕之願  
台州通判回謝少卿啓

庀職鈐黃但索東方之米叨榮銀艾來題仲舉之輿敢  
借蔭於卿雲庶免愆於宦海恭惟某官材高百鷺名擅  
一夔博物洽聞學周公仲尼之道同工異曲有相如揚

雄之風蚤濟美於相門旋蜚英於仕路進陟冰廳之直  
有嘉綿綬之儀漱石枕流方叢祠之燕養鳴玉曳履佇  
華貴之橫翔某久已仰高行將快覩未通名於記室已  
拜闕  
引領光塵譬草木君之味也服膺辭翰贈  
瓊瑤我何報之

賀朱提刑到任啓

伏審寵拜除書榮將使指方君行仁政務臻禁罔之寬  
欲下無冤民尤遴憲臺之選僉言有愜刺部相歡恭惟

某官象載垂光龍淵擢穎厲枕流於清節覽翔仞之德

輝肅括洪深不言而備四時之氣沈浸醲郁所著皆約

六經之文禮初答於鳴騶望遂諧於側席聊闕情於好

爵即策足於要津開卷蓬丘下太一青藜之杖題輿芝

甸貳刺史銀菟之符中臺已歎於郎潛間館乃求於吏

隱惟今澌部蓋列帝畿總一道三尺之權問七州六條

之事疇咨明允來職平反出綍占星有赫光華之遣埋

輪撰日式先畏愛之傳靖民無取於吕刑居位已弃於

晉盜攬轡何久賜環可期某赳赳小才倥侗晚出抗塵  
宦海初無一日之長借蔭鄉雲幸有二天之託未能撰  
屢敢問典籤

回錢簽判啓

伏審光拜宸恩榮司郡畫枉書郵之見及欣騎氣之鼎  
來伏惟某官材智高奇機神警秀過庭有詩禮之學傳  
家得忠孝之風久藉藉於芳猷盍駸駸於膺仕暫總六  
聯之政府忝一幕之賓繼踵相因固棠棣青氈之舊信

眉欲論稱芙蓉綠水之游拔擢可期挽留寧久某頃求  
補外來遙治中聆德惟勤將親仁於僚友効官有賴庶  
逃責於公家

賀錢運使到任啓

伏審光奉制書寵將使指一言寤意載嘉前席之陳九  
式均財遴柬外臺之寄僉諧胥慶刺部知歸恭惟某官  
養氣至剛知言有要清明內照考之皆有宮庭悃悞無  
華渾然不見圭角惟家傳於忠孝宜世濟於功名方持

焚波燥茗之權已見攬轡登車之志厥今制部實謂帝  
畿故繡衣計使之除即紫橐從臣之選比虛茲位始得  
其人欣出綽之占星聞埋輪之撰日一曰食二曰貨既  
知疆國之源流千斯倉萬斯箱更賴裕民之方略行將  
飾擢夫豈淹回某握蹠小才倥侗晚出抗塵宦海曾一  
日之無長借蔭卿雲幸二天之有託

賀李樞密啓

伏審顯拜恩綸進持幾柄當五百興王之名世光啓豐



功惟二三執政以便民疇咨碩德除音既洽頌語允諧  
恭惟某官識邃而明氣剛以大宅英華於道祕激芳潤  
於詞源殫見洽聞已貫穿於今古獨行特立不苟吐於  
剛柔掉鞅巍科振纓膺仕贊理官於聽棘游省戶而握  
蘭久陟都公式騫法從對溫顏於青瑣屢罄嘉猷承密  
旨於黃樞益隆瓌望果奉絲綸之寵遂登帷幄之崇南  
北兩朝方干戈之載戢東西二府宜文武以兼資更賴  
贊襄共躋晏粲某鴈塔綴年家之好麟臺叨朝路之榮

支郡庇身悅置郵之傳命台階矯首因筆墨以成文退  
惟贊喜之深架切瀆尊之懼

賀吳運使除直秘閣啓

伏審光拜渥恩進都顯職埋輪道上威方肅於外臺出  
綽廷中榮遂躋於內閣十連相慶萬口謂宜恭惟某官  
志度淵英宮庭高疑探墳丘之古訓包川嶽之靈暉絕  
後光前惟琢磨於道德彌中彪外不如吐於劉柔蚤負  
遠猷並騰碩聞播弦歌於鳧舄贊筆削於鴻樞論議喟

然風流籍甚燉波燥茗見有司將明之材輓粟飛芻懷  
天下澄清之志既信眉於善類宜紮足於姦朋計定心  
君知所取而知所予望高臂使得其祿而得其名浸結  
上知式騫中秘有煥皇華之寵更隆刺部之權將朽貫  
於邦儲晉楚之富不可及也即翔纓於禁密管晏之功  
可復許乎某偶縛微官莫瞻崇仞速置郵而傳命喜氣  
惟深因筆墨以成文蕪音是懼

賀何中丞啓

伏審出綍楓庭振纓柏寺論諫皆本仁義夙著丹青吐  
茹不以剛柔聿分白黑除音四達僉允一同恭惟某官  
實大聲宏材全能鉅窮草木多聞之觀蹈詩書百家之  
言繡口錦心後學者有所統瑰意琦行諸大夫皆曰賢  
蚤得雋於巍科旋躋榮於拱著是正嘗來於藜杖校讐  
久對於芸籤六察奉公振山岳動搖之職一言獻可當  
國家閒暇之時即長諫垣有光從橐遇聖主和顏而  
納誨故爭臣造膝以伸辭天下麒麟來表康朝之瑞人

中屈軼益高指佞之名忠讜侃然功效卓爾迺峻寵街  
之寵遂隆專席之威風厲霜凝良藥少資於利病雲從  
霖滂巨川行賴於作舟某稍濶光塵欣聞成命聊馳誠  
於削牘敢廢禮於司函

賀執政正旦啓

林鍾上生太簇實函鳳律之和攝提正於孟陬茲協龍  
躔之紀惟棣通於庶物宜萃聚於多祥恭惟某官道貫  
孔門氣吞楚澤侍言帝幙叅二三執政之班發藻儒林

當五百生賢之運履端於始降福孔皆某偶縛微官阻  
趨崇仞遙想頌椒之列敢修行李之儀

賀兩漕進職陞副使啟

伏審深知自結異寵鼎來內閣聯榮益邃雲章之直中  
都改觀更崇星節之稱除目四馳歡心一律恭惟某官  
洪深置度茂粹凝姿學廣聞多友古人於千載材全能  
鉅備和氣於四時久將漕於王圻浸豐財於國帑振黜  
否陟能之任得取盈散滯之方刺史問以六條威聲孔

肅天下號曰八俊望實俱孚存拜懋恩亟躋顯職仰使  
名之既正知朝著之有光雖屈皇華尚賴木牛之助即  
持從橐共期金馬之登某席庇偏州馳誠崇初敢撫輿  
人之誦用塵執事之尊

賀湯運使到任啓

伏審命傳文陛寵陟計臺第二千石之治平無臣出其  
右者總十五州之飛輓有人然後充之刺部知歸僉諧  
胥慶恭惟某官鳳麟嘉瑞川嶽靈暉學漸稽古之源才

負康朝之略自摘髭於上第旋策足於亨衢職業粹然  
聲華籍甚江淮草木知剖符持節之名雲海蓬萊寓磨  
槩懷鉛之直當近郡荐更於秣蠹故清朝遴柬於賢能  
既千室之鳴弦果十行而賜札厥今涓部實古王畿惟  
繡衣使者之除即紫橐從臣之選占星出綍爭聞竹馬  
之迎諏日登車有賴木牛之助考夏疇於八政振漢制  
於六條善類信眉姦朋落膽連城帶邑問出入之錢穀  
幾何足國裕民知取予則古今一也行將拔擢夫豈淹



留某赳赳凡材倥侗晚出抗塵宦海初無一日之長借  
陰卿雲幸有二天之託禮未伸於撰屨誠敢布於典籤



盤洲文集卷五十二



總校官進士臣胡 崇

校對官庶吉士臣李廷敬

謄錄監生臣趙 寅

欽定四庫全書薈要

集部

盤洲文集卷五十五

三至

詳校官助教臣謝登雋



欽定四庫全書薈要卷一萬五千八百三

集部

盤洲文集卷五十三

宋 洪适

撰

啓二十一首

賀何樞密啓

伏審寵傳鳳詔位陟鴻樞天子守在四夷方底修文之  
盛公輔間於兩社允資同德之良帷幄有光紳綏相慶  
恭惟某官人倫儀表天下中庸堯醵舜薰絕翰墨之蹊  
逕周情孔思酌道德之淵源久歷通津荐居言責丹甌

掌授書之柄絳騶揚清路之威志在擊邪如鷹鷂之逐  
鳥雀事先去甚當豺狼安問狐狸輟自南臺浮登右省  
身享懷金之樂人歆執玉之榮簡求茲得於真賢康濟  
益隆於極治蓋一國之慕巨室為政不難惟三公上應  
台階斯拱而竢某竊觀除目偶抗塵容削牘傾心敢贊  
典籤之喜捉衿接武莫勤倒屣之迎

與交代石監丞啓

伏審瞻天拜命暫違金馬之班消日治裝來佐銀菟之

政搖心比屋企踵前騶恭惟某官量賦登閎識該貫變  
振魯叔復興之學讀黃童未見之書六翮高飛三科連  
中酌淵源於道德異乎綆短而汲深煥星斗之文章所  
謂芒寒而色正紙見洛陽之貴馬驚冀北之空既發穎  
於俊躔遂躋榮於華綴前主所是著為律爰筆削於金  
科三人同行必有師久範模於玉葉旋奉虎闥之寵共  
期鰲禁之游何挺特之英姿顧翱翔於半刺雖山登桐  
栢有仙跡之可尋而社接枌榆宜民情之素習政恐賜

環之趣不成煖席之期某一別瑤林五遷緹籥詞壇  
給札嘗叨采菲之兼收郡壘題輿不意積薪而居上况  
甲族有親享之舊復周行依蔭樾之餘逮茲糠粃之  
揚寔賴瑾瑜之匿披承云邇欣慝惟多更嗇冲襟益叢  
嘉祉

答謝將仕投贄狀

講聞雋譽願挹令儀辱謙牧以光臨賁牋函而下問雖  
成蠅誤墨昔嘗被羽以先登而得魚忘筌無復傾困而

羅進益媿瓊瑤之報第榮錦績之藏

謝人授所業狀

比辱光臨寵詒雅製抽琴命操詎知山水之音下筆成章有辱瓊瑤之報

謝人惠生日詩啟

特勤都騎寵貺佳篇牛斗不神媿名聲之何有參辰相比覩光燄以非常退惟褒拂之私良積感藏之厚

謝人惠生日詩狀



男子占熊羆之祥猥勤齒錄美人贈錦繡之段益貢身  
榮方下拜於緘封將永藏於巾衍

賀胡提舶啓

伏審疏榮細札拜職輶軒傳聲五領之南講德百僚之  
上恭惟某官軼材兼美達識不羣抱圭璧之瓊華探簡  
編之奧府久居別駕深鬱遠圖茲奮迅於星輶來典司  
於浪舶惟犀象珠璣之湊置使匪輕非山林川澤之饒  
輸公有限必賴筭鞭之智自多航海之珍僉曰得人可

以利國第恐注思於宣室靡容留憇於外臺某夙仰光  
塵未親謦咳豈期留落於此乃得睥睨之依敢寓意於  
書郵庶聞名於記室

回廣州羅通判啟

伏審授命監州治裝隄領咸驤眉於英矩已傾耳於先  
聲伏惟某官學擅紛綸才誇典麗嘗因野鵬而作賦復  
為仙羊而拜官荐屈題輿不辭叱馭來康南海少煩別  
駕之功入拱北辰高應列星之位某暫緣攝事將獲承

顏書記翩翩愧報章之不敏行邁靡靡願旅食之益調  
賀饒州洪郎中啓

伏審眷深前席寵拜左符燕寢棠陰方畫戟新臨於風  
月螺州芝嶺皆繡衣舊領之山川初布教條遠聆謳頌  
恭惟某官書輕倚相識博胥臣超卓見聞束春秋之五  
傳增多訓故說離騷之一經網羅闕里之蟬嫣是正昌  
黎之魚魯沛然學問藉甚聲名開天祿之陳編光分太  
一賜隃縻之佳墨文應列星迺持刺舉之權常奉平反

之笑賣劍正傳於淮甸夢刀復至於江城召王褒而作  
詩將聞宣室見蓋公而問治欲避正堂即有褒綸入叅  
禁橐某睽違之久慕仰益深頃講宗盟不棄它楊之牒  
茲叨河潤尚稽維梓之恭歲事向闌郡章多暇願謹鼎  
裊之節並隆襟履之休

賀肇慶劉守啓

伏審疏榮象闕作鎮龍藩瓜戍指期允協東龜之吉棠  
陰留景已傳今袴之謠恭惟某官至德中庸大雅宏達

圭璧豈迷邦之寶，梗枏推聳壑之材。蚤馳問於朝，端復承流於嶺表。揚仁風於贈扇，來福遐萌。沛甘雨以隨車，遠追前躅。即聞異政，遂下褒綸。某甫間芝眉，密叨樾蔭。揚衡賓閣，莫瞻五馬之尊。寓意管城，奚報雙魚之遺。

回鄭德慶啓

伏審承榮鳳闕，宣化龍藩。時望允歸，風謠立振。恭惟某官襟靈磊落，知略高明。豫章呈聳壑之材，大呂擅尊朝之器。久潛宦海，連把州麾。硯臺方選於一錢，錦石又歌於

五袴鹿効祥而夾轂不墜家聲績務本以賣刀並崇治  
行即聞褒召遂陟通階某頃際英躋獲親清誨驤眉畫  
戟何因樂霧之披寓意短絨莫報郇雲之賜

回曾解元狀

鏐鋒筆陣彼烏敢當我哉造勝文場無能出其右者鄉  
評允愜儒黨有光先輩積思三都馳芬五嶺充叔簡編  
之讀優游翰墨之林文最善鳴白也詩固無敵言多寔  
用誼之策豈略行瞻鴈塔之崢嶸指鷁行而騰翥肯迂

逢掖見賁長牋某久矣講聞欣然諧際攝空泮水獲聞  
擲地之聲遠迹瀛洲莫快如牆之覩

回侯解元狀

爭鋒筆陣日五色以齊驅造榜文闡心三星而著象聲  
馳枌社喜動蘭陔先輩韶濩諧音梗枏聳榦學周公仲  
尼之道特立獨行有相如揚雄之風同工異曲不輟夜  
分之習素高月旦之評果得雋於槐黃將策勲於芥紫  
章章雁塔衮衮鵷行某舊矣知名足然識面攝空未幾

初非一卷之師揆藻肯臨深愧雙金之報

回戴解元狀

爭鋒筆陣少陸機作賦之年造榜文闡冠王勃齊名之  
傑聲馳里社喜動親庭先輩囊穎有聞席重是似平時  
妙童子之作既擅價於彫蟲一日中有司之程果賞音  
於雌霓不負槐黃之舉能收竹素之功唾手巍科致身  
榮路某久欽警悟幸際清揚暫爾攝空弗補撞鐘之問  
惠然摘藻有慚報玖之章



回傳解元狀

竊審席珍長圖副嘉詔之詳延造榜外臺占賢書而獨  
步它鄉改觀吾黨垂光先輩賦麗孔門氣劇屈壘果見  
舊種之得不負短檠之勤出月脇以蜚聲一枝可折振  
風翰而借便萬里為程某頃幸承顏欣聞中的遂迂方  
履見詒金薤之辭不腆報章有愧木桃之什

代人謝鄭漕舉改官啟

贊赤側三官之事浸及終更受皇華四牡之知頓增倍

價感藏心石喜動背芒竊以鳥有鳳而獸有麟咸知  
為瑞木在山而馬在肆孰辨其良惟真賢司藻鑑之公  
故後進得帡幪之託然錦心繡口者或有山川之險而  
蠟言梔貌者曷分珉玉之殊狐裘反衣而有之柏舟不  
遇亦多矣取人失之子羽何以得才草奏不如陳湯艱  
哉知已謂予不信從古以然如某者馬走質凡雞尸用  
小自保歲寒之質未高月旦之評非韞櫝以求沽何席  
珍而待聘徘徊九品幾韓子之無歸坎壈十年真釋之

之不調偶銅山之設屬致菽水以承親刺史部州十三  
自慚黃綬城南去天尺五莫借丹梯初無鸞鷟鷁雛之  
稱安得蚍蜉蟻子之援豈期內舉獲廁下陳某官濟美  
相門奉芳聖域專繡斧振威之任紹緇衣好賢之宜君  
子存心既埋輪安問當路執事過聽乃推轂下逮菲材  
何知桃李之陰近在瓜葛之末某敢不服膺吏道律已官  
箴巢寄一枝不作南飛之鵲印垂三組庶同左顧之龜  
代承務郎謝梁侍郎舉陞陟啓

曳裾求見偶志目而中眉投牘受知遂鑽皮而出羽有  
識相慶無言可酬竊以國家崇紫橐之班三年使之延  
賞銓選厄綺襦之路五官然後陞朝已離竹馬之遊真  
作土牛之鈍歷倉氏庾氏之職至於再三合社郎廟郎  
之員動以千百抗塵竟走於俗狀累日未離於小官惟  
寸進之艱難曷丈量其長短黑頭年少誰稱飮座之梨  
白脚門生寧望迎霜之兔儻非論薦孰得甄升如某者  
蟠木棄材稀苓下品學未知於習是文不造於紬奇良

治為表莫繼槐花之舉尚書給札空慚棣萼之編猥以  
門資廁於仕版已分為國舍虞比之伍見譏於封胡羯  
末之間敢希敝帚之千金自嗟駑馬之十駕才不才各  
言其子方景行於芝蘭幼吾幼以及之人遂兼收於對  
菲寵踰意表喜溢顏行某官江左興王之臣山東相國  
之種龍返鄉而蛇得路首佐命以負羈魚縱壑而鴻遇  
風久論思而簪筆進入將加諸膝慕才而貴其身分濁  
涇清渭之源賞流水高山之志何期刻畫亦及盤跚某

敢不剟目囊箱游心刀篋有絲麻無棄管蒯仰戢謬恩  
投桃李報之瓊瑤誓堅後効

代徽州尉上太守啓

仕而求祿腰黃綬以遵期我獨有天目朱幡而結想將  
承顏於旦暮敢問訊於寒溫伏念某性不逮中技惟每下  
久焚膏而繼晷非藏器以待時鯉退學詩恐墜過庭之  
訓孔門用賦妄希入室之工屢踏槐花晚穿楊葉脫白  
丁而釋躋齒黃甲以彈冠方塵九品之微復占百僚之

底一行作吏未伸北部之威三釜及親獨喜南陔之養  
問津茲始句庇甚優恭惟某官識冠倫魁學窮淵奧珠  
藏璧韞曠千載而流光鯤化鵬飛搏萬里而直上未  
登金馬聊佩銅魚惟大賢無所不容故小人恃以不恐  
幘幪有賴捶楚可逃敢不律已官箴游心吏道牛刀而  
割雞未用敢希顏籀之風鶚薦而累鷺不如尚冀孔融  
之鑒

又迎新守趙監丞啓

紫禁疏恩榮佩左符之重朱幡戒道聿嚴前弩之迎老  
稚知歸封圻改觀凡叨屬吏倍激懽悰恭惟某官川嶽  
靈輝鳳麟嘉瑞出神明之貴胄負標的之清規德備忱  
恂獨樂東平之善學該貫變盡讀河間之書蚤掇巍科  
浸躋臚仕自典尚方之職益宏大雅之休肆外閤中論  
議冠諸宗室光前絕後名聲顯於朝廷暫違金馬之班  
荐<sub>闕</sub>銀菟之寄治裝伊始流化有期幸此大州得依慈  
父雖叔度之來何暮式佇袴襦胡陸君之去不留弟光



衣佩使幼女復興於孝行豈小人敢致於私情遠紹昔  
賢政在今日恐棠陰之未久即芝檢之鼎來某赳赳凡  
姿倥侗晚出賦鼠窮之短技守狗曲之淺聞屢踏槐花  
偶穿柳葉初占百僚之底未開三尺之從仰恃幘幪庶  
逃播楚信眉自慶將逢流水之知引領方勤佇快青天  
之睹

代齋長見新教官啓

仰如北斗夙裝蹈景之懷志在高山將遇知音之聰敢

脩尺楮庸布寸心伏念某胄本單平稟非奇卓夏絃春  
誦空坐對於短檠朝蠶暮鹽幾悲歌於長鋏溯閩川而  
泛梗樂鄱水以采芹濫陪講說之儔蔑有切磋之善中  
焉行役遯矣滯留復尋仲蔚之居已失邯鄲之步處齋  
房之前列曷足長人直橫舍之攸司猥令代匱方趁槐  
黃之舉妄希芥紫之榮欣哲匠之鼎來冀頑姿之速肖  
大衍掛一庶窮犧畫以東歸宵雅肄三或俟鹿鳴而西  
笑夫何僥倖有此際遭恭惟某官學博五車文無千橐

燕之角荆之幹獨擅美材湯作濩舜作韶宜薦清廟屢  
鼓詞闡之氣益馳藝圃之名驚大器之晚成快景星之  
爭覩廣庭首唱諸老先生未能言便坐口談當時弟子  
有所記三歎坐氊之冷久期朝席之重即有袞綸入躋  
華綴遂袞袞青雲之上豈鬱鬱絳帳之間尚容負笈而  
前少遂撞鐘之叩某自鞭十駕願反三隅問鑄金得鑄  
人已獲求師之益若食雞必食跖終收善學之功

盤洲文集卷五十三

欽定四庫全書薈要卷一萬五千八百四

集部

盤洲文集卷五十四

宋 洪适

撰

啓二十六首

代廣東帥屬謝帥啓

問津黃木之灣甫窺宦海竄籍紅蓮之府仰泛恩波即  
尸素以懷憂敢殺青而通謝伏念某稟生推魯探道艱  
難拜千佛之經莫能趾美聯五星之集有愧齊稱學書  
既已不成為器遂同無用濫塵官簿空積歲躔因定省

於親闈遂徘徊於炎嶠歎庸材之牆面筮臚仕以灰心  
臨淵羨魚初覬叢祠之末秩乞漿得酒乃叨戎幕之下  
陳徒誦過庭之詩未閑作吏之事惟片長可勝任使奈  
狹見不足激昂非賴包容難逃汰斥恭惟某官雕龍博  
學雌霓垂光蜚妙譽於簪紳補嘉謨於帷幄課先撫  
字聿高使竹之分志在澄清克受皇華之遣荐佩十連  
之寄歷提五管之封里詠塗歌已洽袴襦之樂山行海  
宿寂無枹鼓之鳴宜錫詔綸入持從橐豈令賤子久託

餘輝某率爾彈冠欣然望履見父之執方自躍於鑪錘  
御衆以寬願少私於轡策

代高要丞上鄭太守啓

餬口四方妄發彈冠之請庇身大邑叨居涉筆之官正  
結想於高牙輒露情於小牘伏念某學初茅塞識遂棗  
昏語寧反於三隅能不名於一藝白駒過隙雖抱子以  
何知黃金滿籬在傳家而有忝亦嘗諾仕纔得奉祠方  
九重天遠念於澤南故萬戶縣皆為之立貳首令攝事

未通為政之經足以送窮不勝負公之媿趙趙欲進瘳  
曠是憂仰庇卿雲豈無道地此蓋某官鵬圖擊海鶴瑞  
鳴臯獨鍾喬嶽之暉共推清廟之器存都顯職大播  
休聲瑞既協於夢刀仁即揚於贈扇葱葱王者之氣夙  
重潛藩廩廩君子之風聿追顯祖惟陂量兼容於弱吏  
庶鰥生得視於聾丞某整楫非遙執鞭可冀自思牛馬  
之走無所取材甫親雁鶩之行敢不盡力

代封州簽判謝帥啟

餬口遐方妄發彈冠之請庇身近郡叨為入幕之賓仰  
戢厚恩敢通小牘伏念某學初茅塞識遂棗昏語寧反  
於三隅材不名於一藝白駒過隙雖抱子以何知黃金  
滿篋在傳家而有忝亦嘗卜仕纔得奉祠頃辱外臺俾  
丞大邑偶黃茅之感瘴致行李以愆期仰惟元老之尊  
獲遇大人之行進瞻步武幸披霧於公庭曲賜齒牙遂  
回春於寒谷殆類塞翁之失馬自驚龍伯之得鰲惟有  
感銘莫知論報此蓋某官包羅間氣貫綜多聞闕紫闥



之榮途贊黃樞之密議始居輔地無庶民愁恨之聲暨  
擁使軺有天下澄清之志遂臨八桂即詠兩岐旋出綽  
於西垣迺建麾於東廣寬猛相濟茂懷市虎之疑剖決  
如流不事淵魚之察俯憐窮蹇遂致僥逾某敢不虔畏  
簡書力鞭駑鈍量長校短遂無尺寸之能抱公滅私或  
覬涓埃之報

代謝吏部李侍郎啓

把麾五嶺已消西道之聲出綽九重復玷東偏之寄裝

懷增懼揣分知歸伏念某業守青箱用慚赤箭賣刀買  
犢存辜銅虎之分輓粟飛芻未達木牛之運牧人久矣  
奏課缺然恐獲戾於備員忽拜恩而更治仍躋延閣併  
寵哀蹤此日集衙無聞名之龍戶它時報政空貽辱於  
羊仙僥倖如斯吹噓有自此蓋某官量侔山藪識蘊著  
龜蚤知藉稻之文獨富粲花之論主刑仁恕議者謂過  
于張典選清平人曰後有盧李夙懷推輓共賴主盟惟  
曲賜於品題致連叨於任使某自閱星躔之覩屢驚斗

柄之移軟水易心益厲吳公之操薄征疎目仰師韓子之言

宮使梁尚書啓

某官生逢慶會譽滿華塗有燭照龜卜之明兼地負海涵之量得劉晏之取予任蕭公之轉輸足用地官斗筭之徒何算也伸威天府銖兩之奸皆知之蚤聯職於寶儲暫均休於珍館獨司推挽共賴主盟載惟鼠技之窮夙受鶚書之薦傳之羽翼賜以齒牙獨私華袞之榮猥

遇高山之聽致叨任使盡出吹噓某敢不拔薤抑強酌  
泉厲操可繼宋璟盧奐伏仰前芳失之子羽宰予益慙  
厚遇

福州張侍郎啓

某官量賦登閎識周賁變味道腴於七略包文體於百  
家曲臺高稷嗣之除起部造郎潛之列並崇晝接疊慶  
歲遷內舞舜干仰仁天而簪筆出懷蘇印洽惠露以隨  
車積有功名著于中外撞牙桂管嘗復借於冠君徙節

閩川歌晚來之賈父自顧散樗之質夙遊棲鳳之林惟  
接武之好尤深故推較之言益過致叨推擇有辱品題  
某心係重階誠殫小牘準程前哲欲厲操於貪泉寤寐  
清規庶免愆于宦海

回李惠州啓

伏審懷章去國式臨瓜戍之期森戟專城將決棠陰之  
訟遐萌相語慈父斯來伏惟某官德宇粹溫風規高劭  
蚤擢奉常之第宜居著作之庭既荏苒於歲年尚棲遲

於簿領以名字而典郡允得循良有方略以為民自然  
富庶治行聿追於名杜歡聲將軼於羅浮某頃接班聯  
浸睽顏采方喜戒途之報已勤削牘之音書細十行即  
遠盼於褒詔河潤九里猶少借於餘波

問李虔州啟

把麾五嶺已消西道之聲出綍九重復玷東偏之寄甫  
恭朝夕遙問寒溫某官學富家傳言推世則自奉專城  
之寄遂深當宁之知刺史省以六條夙稱桂海天下號

曰八俊益振荆湘來司章貢之權兼用黃韓之化紀綱  
大舉謳頌載騰為官乎為私乎變貪殘於一問行山者  
行澤者熄椎剽之羣驚治已疏於御屏寵將持於從橐  
某受材甚下任職無長方軫慮於譴呵忽冒榮於推擇  
退惟僥倖端出品題念平生雲霧之披獨彼此參辰之  
濶雖烹魚狎至有踰從事之賢而覩鳳後期未降君子  
之見每遡洄而結想空蹈景以興懷比獲守於郡封迺  
密切於隣寶相依唇齒願投分於蘭金敢布腹心幸攄

誠於藥石

謝溫劔南啓

把麾五嶺已消西道之聲出綍九重復玷東偏之寄顧  
薄材而知懼枉榮問以增慚此蓋某官學博書倉識窮  
理窟蚤擢奉常之第旋陪中秘之遊武成之策二三盡  
讐謬謬捷為之磬十六能考異同已垂上於雲霄迺遠  
分於符竹物華天寶龍神潛合劔之津里詠塗歌黃犢  
化佩刀之俗夙保歲寒之契獨私月旦之評遂致迂疎



猥叨推擇某睽離久矣瞻邇眷然書記翩翩若高談之  
對面故人戀戀冀清誨以傾心

回陸全州啓

朽質叨榮已佩五羊之印高情贊善復貽雙鯉之書謙  
謙仰君子之風戀戀深故人之意某官機雲家世名杜  
材猷燕寢清香寂棠陰之少事蠻溪豪族無薤本之可  
除當翺翔金馬之間豈留滯銀菟之久某馳心英鉅引  
脰崇墉遠矣嗣音顧瓊瑤之何報使之免戾幸藥石之

不忘

回蔡學士賀生日啓

侵尋晚景知牛斗之不神煥爛彫章仰參辰之相比倍  
戢深仁之眷益增初度之光恭惟某官瑞企清明氣涵  
剛大表表出塵之逸韻英英秀世之芳規隱映奧篇讀  
黃香之未見鴻詞麗藻稱王翰之可珍久肆志於林泉  
自怡情於風月夙蘊愛人之德獨存介壽之心俯為初  
生欲其難老一言假借或松栢之後彫十襲祕藏顧瓊

瑤之匪報

回湖南韓總管狀

五領作藩已銷聲於西道九重錫命遂更治於東偏  
室之未通迺書郵之先及某官識探李法名擅于鄉  
國士無雙有登壇之鼻祖一人當百多戰野之膚公輕  
裘夕撫於龍州精甲暫屯於鄂渚顧惟繇薄方媿叨逾  
操筆覲然莫報翩翩之問接辭遠甚空耿耿之思

回知州惠生日詩狀

定三百六旬之歷會遇生朝知四十九年之非侵尋晚  
景曲荷松喬之祝光垂李杜之文伏惟某官撫字知名  
中和興詠聽訟美甘棠之憇勸農傳岐麥之歌性不違  
仁語皆揚善其詩孔碩壽欲俾之熾昌何德以堪榮但  
深於藏弄

回趙新州狀

竊審黻纓西笑小遲象闕之行理橐東來暫攝魚符之  
事先勤榮訊足見高情伏以某官名擅宗英才推國器

九流索隱能讀河間之書千佛聯芳同射平津之策蚤  
傳諾仕已歷專城置任棠之孟清哉若水贈袁宏之扇  
仁者宜風行將擊柝之聞猶限盍簪之阻

回廣西張幹狀

半年懷舊常望岫以馳心千里寄聲若飛談而對面深  
銘永好采激私情某官韻秀朱霞才淹綠水傳幕中之  
辨是謂能官流地上之錢共推善計念斯遠別失我良  
朋枉兼牘之鱗鱗媿報章之草草

回潮州沈通判狀

伏審拜恩中禁贊治偏城枉雲翰以見詒傳星屏之甫  
至某官聯橫許郭方駕曹劉蚤擅價於俊躔久韜光於  
仕路居展驥之任寄實重於監州誦訓鯁之文功正煩  
於康海念聞名之有素曾會面之未能不腆報章奚酬  
雅眷

回鬱林知州狀

睽濶清談屢閱飛葭之變周旋雅好遠承裁楮之臨某

官養氣渾雄存心撫字此時褒詔賜黃霸以兼金它日  
歸舟載陸君之一石念披瞻之未再徒結約以彌深

回周貴州謝到任狀

竊審承流鐔水既拜魚書攝事貴州已懷屏印某官風  
儀清整器局沈深歌麥兩岐前乎既聞耳矣拔薤一本  
今者復盡心焉即有褒綸入登華綴曲枉翩翩之遺第  
慚草草之酬

回趙賀州謝任滿狀

竊審解龜古郡鞭鳳亨衢曲垂問訊之勤益佩論交之厚某官材推標的學載本原比及三年已見與求之政統如五鼓不勝挽鄧之情名已列於御屏榮即躋於省闈邈爾承顏之便悵然引脰之私

回范總幹狀

竊審承恩雲闕列屬星臺已協吉於成瓜遂寄聲於行李某官風儀秀峙器宇淵深有家學之相傳更吏材之是似足兵重鎮吐計畫於幕中退食私闕奉皇華之膝



下增益過庭之訓軒騰當路之知念昔桂林寔望蓮府  
睽離既久瞻邇靡忘情非鹿鹿之交禮重鱗鱗之貺

回汪經幹謝舉削狀

征茅引類寔採公言摘藻鳴謙難當私謝某官淵源賦  
學通敏呈材久贊外臺又屈紅蓮之佐尚淹小選未高  
碧落之飛寶雖識於照車言媿輕於推轂曲承榮訊深  
戢勤情

回石縣尉狀

竊審青錢中選黃綬榮歸喜動親聞光生里閭某官識  
探理窟學富詞源廣陞臚傳共仰鯤鵬之化遐方諾仕  
難淹騏驥之馳益載休聲遂階要路未皇贊喜已辱  
貽緘

回封州教授狀

竊審瓜時涓吉芹泮恢文枉兼牘以見貽佩高情之良  
厚伏惟某官學能日益辭不雷同早聯千佛之名已得  
羣公之譽當聖主大崇儒術故遠方皆置學官坐絳帳

以談經少煩模範登金門而奉詔即見羽儀懷雅論以  
奔馳愧報章之崖略

回鄭德慶啟

竊審治聲夙著靡俟造朝吉語載馳復欣典郡方一麾  
之宣布宜千里以謳吟某官西都循吏之孫元祐名臣  
之世論議共推於魁壘典刑可見於老成未攄經國之  
材獨紀牧人之効向來剖竹乃先帝之潛藩今日憇棠  
又吾君之舊邸惟兩城之相接在五嶺以稱雄必有異

能遂看褒渥某班荆未幾紆軫已深聲迹相聞斯不踰  
於數驛簡書可畏尚有賴於餘波

回陳英州狀

比承謙誨欲得剡章寔循三尺之文重屈雙函之禮某  
官彰名鴈塔鏟采藍田麥秀兩岐已藹聞於善政河潤  
九里更密借於餘波將滿秩以趨朝遂正名於典郡難  
虛爵里之辱漫備銓曹之須豈題拂之敢云蓋扶搖之  
可俟

回潯州知州狀

遠隲五領榮把一麾得之流聞無不稱頌某官包淵深  
之度負超卓之材既問政於蓋公欲追蹤於召父沛隨  
車之甘雨惠愛無涯揚贈扇之仁風芬芳大播行當簡  
拔夫豈淹徊念久講於英聲曾未陪於雅論頃傳得郡  
將期王事之同偶玷移藩遂有鄰封之隔聊通柔削莫  
報珍題

盤洲文集卷五十四

欽定四庫全書薈要卷一萬五千八百五

集部

盤洲文集卷五十五

宋 洪适 撰

啓二十五首

賀廣西向運使啓

伏審出綸內闕乘傳外臺騰八使之風聲威行荆渚指  
二天之星次光燭桂林朝野僉諧江山改觀某官韜藏  
遠業充牣多聞才握隨和擅當今之奇寶聲諧韶濩傳  
上古之雅音飽說吏師獨優才具政嘗喧於歌袴名屢

振於埋輪尚遲金馬之游復領木牛之寄用知取予維  
出入錢穀幾何志在澄清豈奉行文書而已寧容煖席  
即見賜環某夙綴末交浸睽英範偶剖竹有善鄰之賴  
更揚糠深前事之慚敷衽論心徒起仰高之恨裁緘寫  
抱莫酬問託之勤

回劉肇慶啓

伏審瓜時而往懷印綬以臨州穀旦于差擁車轡而夾  
道厥初班錄咸有謳吟伏惟某官學考聖賢望尊者舊

試吏見慈祥之政濟時懷超卓之材出魚契於九重鎮  
龍藩之千里昔襦今袴已騰蜀郡之謠右粥左餐可遂  
蔡人之樂行將促召夫豈久留某近枉高軒遂承英範  
唯鄰是卜幸借潤於靈河無言不疇聊嗣音於芳牘

賀胡提舶交割啓

伏審戴星叱馭消日視章咸屬耳於前騶獨驤眉於英  
矩伏惟某官居今行古肆外宏中裂芟製於塵埃久躋  
臚仕分苕溪之風月屢贊名藩遠將五嶺之權盡幹萬



商之貨允謂濟時之彥斯多航海之珍即恐賜環豈容  
暖席某自聆顯綍嘗貢柔緘喜聞持節而來時乃把麾  
之幸萬事不理待伯始而可知一坐盡傾傳孟公之將  
至更期冲嗇式副瞻翹

賀余虔州啓

伏審疏恩中禁作鎮雄藩城郭重來指繡衣之理所兒  
童相記騎竹馬於道周初布教條側聆謳頌恭惟某官  
圭璋寶器杞梓良材家學相傳無畝向異同之論儒名

夙就少甘奇顯赫之年復掉鞅於巍科浸著鞭於要路  
臺綱大振獨高屈軼之名郎位有光嘗拜隃廩之賜迺  
駐車於章貢草珥筆於筠袁已見澄清復將漕輓方遘  
鵠而奉計又分虎以牧人所至移風不事縫裾之策自  
公退食更多戲采之榮既久習於民情宜易臻於治效  
即頒綸綍歸侍冕旒某偶玷郡麾獲依鄰燭號五雲體  
雖屢枉郇公之書封萬戶侯恨未識荊州之面

賀沈提點啓

伏審榮錫天書寵持星節立九府之圜法久訪能臣專  
三官於上林外兼數路邸音既洽時望攸歸恭惟某官  
英偉賦才淵宏置度糟粕不膠於紙上官商皆起於筆  
端鞅掌魚符有淮人之孺慕規恢驪駕無漢士之色飢  
益懋簡知果膺顯擢廣攬轡登車之寄揔治鎔炊炭之  
司權子母之重輕少煩心計接夔龍之步武即聽履聲  
某自濶台躔屢移斗柄皇華甚遠旅進退以未能蔭樾  
焉依大譴呵而或免

回陸提舉啓

榮拜明恩進膺褒擢一麾出守輟近郡之股肱四牡載  
馳寄外臺之耳目郵音甫暨僉誦相歡恭惟某官德粹  
珩璜學該竹帛雲間烜赫追入洛之清芬嶺表崎嶇偃  
說佗之雄辯自結冕旒之眷見稱簪紱之英久藉藉於  
仕途將駸駸於禁路朝廷深知治行連付虎符原隰遠  
有光華暫煩龍節即仰北溟之擊豈為南越之留某幸  
綴親享遂依蔭樾方捫襟而自喜將聽履之有期牒訴

喧囂不敏寒溫之問山川跋涉願言裊之調

回鄧漳州啓

拜恩丹宸宣化黃堂方增重於郡符已分輝於鄰燭某  
官受材卓偉函器宏深蚤發策於儒科旋濯纓於朝路  
連得三刀之夢尚煩雙戟之臨雪白蘭薰獨廉清之名  
顯風行草偃即豈弟以政成行遂陟明豈容斂惠某屢  
通聲問未際色辭頃接鳳毛斯見義方之訓遠勤雁足  
益知謙德之光

回竇賀州啓

顯差穀旦榮憇棠陰凡千里之提封皆一詞而詠德某  
官聯珠傳業片玉呈材力晞青史之賢荐拜朱輪之寵  
馬如羊而金如粟清節素傳刀買犢而劍買牛遐萌丕  
變即看褻渥入造要班某久闊高標每懷餘論借寶鄰  
之潤幸擊柝以相聞佩謙德之光媿濡毫之不腆

回徐通判狀

承榮北闕受任南州篤雅眷以相先飾珍膳而見及某

官軼材耀穎盛德照鄰蚤馳黃絹之辭久載素絲之節  
饒清橫浦謂盡展於鵬圖贊治三城又少煩於驥足即  
聞改命豈復遠來念平昔之搖心獨差池於會面偶分  
使竹喜傳半刺之賢尚隔成瓜恨失同僚之便

回李惠州狀

竊審撫柔名郡靡辭南嶠之行差擇良辰已協東龜之  
吉某官學充素蘊譽藹清芬法任棠水薤之言略黃霸  
米鹽之細豐湖足樂顧何羨於谿堂法坐見思遂入翔

於禁瑣少看游刃以俟追鋒某密邇門闌無繇談款亭  
瓜相接幸分餘燭之光行李存臨有媿雙金之報

回權梅州狀

比以偏城闕守僉議擇人果得循良往甦凋瘵辱華緘  
之見及知善政之有為欲腴供億之須既能身率不競  
追科之考更在力行

回南安知軍狀

聲聞擊柝如脣齒之相依情重裁緘見肺肝之相示彌



戢能謙之德第增不敏之慚伏惟某官風規闡明德宇  
宏達夙著素絲之節遂居畫戟之榮比屋爭傳有去蝗  
之異政長城自衛却聚蟻之妖氛即聽褒嘉進班清切  
某搖心雖久識面未能方商律之告窮冀黃堂之善葆  
回劉通判狀

竊審拜恩象闕諾仕羊城共誇別駕之賢已作著鞭之  
計某官材猷奮發襟韞粹醇早欣畫於外臺即颺芬於  
華轍歌功康海煩驥足之一來得志摩空看鳳翰之橫

絕雖平時濶半面之雅在難兄契同心之交何幸為邦  
遂將聯事遠勤芳訊愧不腆於報章時近薄寒冀自願  
於旅食

賀田提刑啓

伏審罷拜恩綸榮將使指上方任德務臻禁網之寬官  
必擇賢尤重憲臺之選英塵所暨僉論相欣某官奎璧  
孕靈溜澠納度蚤策勛於雁塔即接武於鴈行六察去  
邪仁約張敢言之膽四知厲操陽城勞撫字之心爰奉

真祠少休故里忽顛卒哀凶而疊作雖郡僚避難以宵  
奔獨追憑軾之風高出投機之計聚鱸鮑於孤壘不使  
橫行庇簪笏之名家盡皆寧處旋致靈旗之集弗稽蕭  
斧之誅迄能脫離於妖氛信有護持之神物偃先聲於  
桂甕遠應二星迎異數於楓宸行躋兩禁某離羣之濶  
蹈景已深偶左契之託鄰將漸餘潤幸繡衣之假道即  
際清標憑竿牘以攄情冀鼎裊之垂意

謝陳經略啓

垂弧紀旦慚學易之無聞削牘鑄辭辱過情之善祝雅  
懷借重陋質生輝恭惟某官聳壑呈材照隣蘊德貫魯  
壁鄴家之讀播函京灞岸之工八俊乘軺應景星於高  
閣  
連植纛洽惠露於遐萌少借銀菟即班玉筍某夙厚  
合符之好曲私踰袞之褒記軫生初禮踰望外俾爾黃  
髮欲三壽之作朋遺我綠琴顧雙金之何報

回南恩權州狀

竊審龜筮告猶魚符攝事染華緘而見遺知初政之甚

休某官心術疏通吏材英發盤錯迺彰於利器委蛇見  
詠於素絲種韭一畦雅有澤民之志鳴絃千室共推典  
郡之能少借剝裁以看潤飾顧分攜之未幾在翹邈以  
彌深願寶生經遂躋榮次

回袁教授狀

竊審拜恩帝宇分職教官枉汗竹以甚勤知往瓜之已  
及某官學稱經笥譽振儒林絳帳垂堂將應撞鐘之問  
褰衣匝序可無鳴鼓之攻即對言綸遂榮朝黻幸從容

之有便冀跋履之自願

回德慶通判狀

受任題輿涓辰視篆提封千里講德一詞某官量賦深  
沈材推敏妙嘗割雞而小試聊展驥而遠來風月平分  
已翱翔於半刺雲霄濶步即騰躍於高衢方念語離遂  
勤遣訊尚濶從容之便第增翹佇之思

賀林尚書啓

伏審寵拜耀章進都榮次天官其屬六十久虛常伯之

尊武王有臣三千孰出鉅公之右絲綸所布簪紱謂宜  
恭惟某官學富盈科量深韜世追風枚賈能緯典以敷  
華發采隨何蚤席珍而待聘歷芹宮而假道陟栢寺以  
尊朝既接武於夔龍之間遂垂光於虹蜺之上臺綱克  
正時高三院之威諫草必焚名重七人之長妙簡已隆  
於蠖獲祥輝迺燭於文昌望峻官儀上星辰而聽履私  
無賓謁指風月以飛談即踐台槐共寧邦本某庀官有  
守贊喜無因體號五雲屢枉鳴謙之誨侯封萬戶未降

快覩之心

賀張洪州啓

出綸中禁換節大邦賓客鼎來屢下凝塵之榻山川改  
觀一新卷雨之簾聞視篆以敷和輒褰牋而贊喜恭惟  
某官梗柟聳壑奎壁垂芒和璞隨珠早席珍而待聘潘  
江陸海能授簡以騁妍若時題品之公自奮功名之會  
行貳卿之紫橐承密旨於黃樞備殫獻納之忠欲試藩  
宣之寄統如五鼓遂誼吳郡之謠願借一年久斂桂林



之惠幕府既移於閩嶠正堂曾問於蓋公眷益簡於帝  
心任復隆於方面令行數月已慰八州之人色比三台  
即迎一札之召某自續貂於曩日不對塵者六秋承乏  
連疆迺借瓜疇之潤指期就道庶披棠舍之陰商節淒  
其高牙樂只冀鼎裊之勿爽副簪紱之具瞻

賀呂桂州啓

列職蓬丘揔戎桂筦遠人相語潛消佩犢之風輿誦攸  
歸共起駢鸞之詠吉諧剛日歡動隣封恭惟某官識妙

倫魁材高肯繁種學遠窮於丘索吐辭皆中於宮商惠  
露霑濡最謳吟於名郡華星輝赫聳風采於外臺方清  
朝久戢於干戈故重鎮分屯於介冑足食政勞於心計  
列城咸肅於指撝遠勤頗牧之謀難屈管蕭之寄遂班  
內閣來鎮南垂幕府雄開初笑談而緩帶居毗安作不  
愁歎於無襦即迓賜環未容煖席某情深引脰願曷承  
顏揚秬居前既自慚於陳迹灌瓜甚美遂有賴於餘波

賀張福州啓

名簡帝心任隆方面高牙大纛最九牧以橫飛緩帶輕  
裘挹三山而坐嘯政新視篆喜浹提封恭惟某官嵩岱  
稟暉淄澠納度材高盤錯擅多多益辦之稱節貫險夷  
玩蹇蹇匪躬之象浸騫華貫茂著躋功足用版曹妙幹  
貨泉之柄耘強圭甸稀聞枹鼓之鳴既晝接之益章宜  
歲遷而咸允書殿極儒紳之貴齋壇分將鉞之雄襄漢  
上流有賴長城之扞豫章大府久喧慈父之謠拜寵自  
天揔戎易地惟閩粵東甌之俗本會稽南郊之疆邇今

日之上都迺一時之重鎮民其幸矣公實臨之少煩統  
御之良即叶都俞之會某自睽巖電屢閱秋霜竊食海  
瀕復借光於鄰燭馳誠門仞敢贊喜於書郵願言裊鼎  
之調式副紳綏之望

賀黃提刑啓

渥對綸言榮將使指上方任德務臻禁網之寬官必擇  
賢尤重憲臺之選馳聲舊部聳望遐萌恭惟某官學探  
九丘文長三變黃鍾大呂參嶰律以含和北斗泰山偃

儒紳而蹈景蚤接夔龍之武遂我獬豸之冠自結深知  
式分遠寄乘輅久任周五嶺之東西宜岸屢空踰諸公  
於前後人共期於紫橐命復畀以青氊雖平反大慰於  
羣情豈獻納可遺於夙德寧容席煖即以節趨某獲保  
歲寒欵依雲蔭承流千里已逾請代之期借潤二天尚  
有承顏之便願言沖嗇庸副瞻翹

賀虔州李太尉啓

竊審寵膺恩綍榮把州麾藉甚威名洋然謳頌恭惟某

官追蹤細柳經武前茅結髮從戎功屢先於勇爵執戈  
衛社忠益顯於周廬提銳旅以鷹揚掃孤城之蟻聚智  
謀既運氛祲遂空綏帶輕裘少借蕃宣之重高牙大纛  
即開慶賞之行某講服有年披瞻無日幸託寶隣之潤  
聊通書驛之誠


回董梧州狀

宦海聞風恨差池於英矩州符按畛幸假借於餘波方  
聆視篆之新已枉揮毫之況伏惟某官幹時良具耀穎

逸才克全白璧之名久厲素絲之節翔鸞集鳳駕前錄  
之美談佩犢帶牛革遐萌之舊染少煩游刃遂迓追鋒  
念引領之空勤曾論心之未便第堅鄰好不腆報章



盤洲文集卷五十五



總校官進士臣胡榮

校對官庶吉士臣李廷敬

謄錄監生臣趙寅